

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Mizoram State Boxing Championship khelh mekah POCSO case-a a tuartu hmeichhe boxer te khelh ve phal an nih loh chhan sawifiah anih hma loh chu he championship hi titawp nghal turin Mizoram State Sports Council-in a hriattir.
- 2. Sorkar laipui hmalakna hnuaia mipuite hnena faina pawimawhzia inzirtirna, Swachhata Hi Seva chu Mizoram hmun hrang hrangah kalpui mek a ni.
- 3. Union Cabinet chuan ramchhunga lawng siamna hmunpui leh a kaihnawih eizawna ti nung thar turin package cheng vaibelchhe sing 6 sang 9 leh 725 a pawm.
- 4. Sawrkar laipui chuan Pradhan Mantri Awaas Yojana-Gramin (PMAY-G) hnuaiah chenna in vaibelchhe hni leh nuai 82 chuang sak zawh tawh a ni a ti.

<><><>

MSSC

Mizoram State Boxing Championship khelh mekah POCSO case-a a tuartu hmeichhe boxer te khelh ve phal an nih loh chhan sawifiah anih hma loh chu he championship hi titawp nghal turin Mizoram State Sports Council-in a hriattir.

Mizoram State Sports Council Secretary Pu Henry C.Lalrawnkima chuan vawiin khan Mizoram Boxing Association President leh Secretary hnenah lekhathawnin, Mizoram Boxing Association-in an buatsaih, Mizoram State Sports Council (MSSC) Golden Jubilee 44th Mizoram State Boxing Championship, Lunglei a khelh mekah POCSO case-a a tuartu hmeichhe boxer te khelh ve an phallo ni a puhna chungchangah Child Welfare Committee (CWC), Aizawl District atanga Mizoram State Sports Council-in hriattirna an dawn bawzuiin he inpuhna hi thu dik a nih leh nih loh bakah khelhtir an phal loh chhan an sawifiah hma chu he championship kal lai mek hi titawp nghal turin a hriattir a ni.

Hetihlai hian, Serchhip District Boxing Association Secretary Kaptluanga Ralte chuan Mizoram Boxing Association President leh Secretary hnenah lekhathawnin, he thilthlenga tuartu hmeichhia te hi Serchhip District aiawha khel tur an ni a, amaherawhchu mipat hmeichhiatna lam rawngkaia kumtling lo Boxer te a lo khawih thin avanga POCSO Case a Jail tang mek MIZBA ROC Chairman

T.Lalthlengliana thlavang MIZBA in an hauh hlah zawk chu mak an ti hle a ti a, Boxer 3 te chu an khel lehna tura hma la tura ngenin, an ngenna a hlawhtling lo a nih chuan an Boxer te leh Serchhip atanga R.&J Official Duty tura kal zawng zawngte chu an inhnuhdawh tur thu a sawi a ni.



RASHTRIYA POSHAN MAAH

Chaw tha ei pawimawhzia inhrilhhriatna Poshan Maah hman mekah vawiin khan ICDS Khawzawl Project chuan CDPO Pi Esther Laltlinpuii hovin Khawzawl Vengthar YMA Hall-ah thau luat hlawhawmna inzirtirna buatsaih a ni a, he hunah hian Dr. Albert Lalhminghlua, Medical Officer chuan kalkhawmte zirtirna a pe a ni.

He Awareness-ah hian Khawzawl khawpui chhunga Anganwadi Centre hrang hrang atangin Worker leh Helper te an tel bakah Khawzawl ICDS Project hnuaia Khawzawl khaw pawn lama Anganwadi Centre hrang hranga Worker leh Helper ten Online in an telpui a ni.

Resource Person Dr. Albert Lalhminghlua chuan tunlai hunah thil tui taktak ei turte awm tawh mahse taksa in chaw tha a mamawh ang a hmuh phak loh vanga hrisel lohna leh natna chi hrang hrang nei an tam tih a sawi a. Hei hi chaw pangngai taksa in a mamawh ang ei lova nepnawi ei tam lutuk vangte a ni tih sawiin hei hian taksaah thau lutukna te, zunthlum leh natna dangte a thlen phah thin tih a sawi a. A bik takin mawm leh thlum ei tam lutuk hian thau chhia a siam avangin heng lakah hian insum a ngai a, naupangte zingah pawh thau lutukna leh zunthlum nei te an awm tawh avangin naupangte pawh an ei leh inah thunun an ngai tih a sawi a ni.

CDPO Pi Esther Laltlinpuii pawhin he hunah hian thu sawiin naupang zingah thau lutuk (Obesity) an tam ta chu nu leh pa ten veina chang an hriat a tul tawh tih a sawi a, Obesity hian naupangte rilru thlengin nghawng a nei thei a, mahni inrintawk lohna leh midangte tluk lova inngaihna te a siamsak theih avangin Anganwadi atanga tan lak a ngai a ni a ti.



SWACHHATA HI SEVA

Sorkar laipui hmalakna hnuaia mipuite hnena faina pawimawhzia inzirtirna, Swachhata Hi Seva chu ram pum rualin Mizoram hmun hrang hrangah pawh kalpui a ni.

Kum 2017 atangin kumtin chawlhkar 2 chhung ram pumah hman thin a ni a, India hnampa Mahatma Gandhi piancham October ni 2-ah a kharna hun hman thin a ni a, Mizoramah pawh ram pum rualin kumtin hman ve thin a ni a, he hmalakna hi Swachh Bharat Mission hnuaia neih thin niin, Ministry of Housing and Urban Affairs leh Department of drinking Water and Sanitation hnuaiah khawpui Urban leh thingtlang Gramin kalpui a ni a, Mizoramah chuan khawpui chu UD&PA in a chang a, thingtlang chu PHE department in a chang thung a ni.

Kumtin thupui hrang hrang neih thin niin, kuminah chuan "Swachhotsav' tih thupui hman a ni a, hemi awmzia chu vantlang mipui punkhawmna kut hmanaah te bawlhhlawh a tlem zawk nan leh bawlhhlawh te felfai taka thehthang a nih theihna tura hmalakna a ni.

<><><>

GST REFORMS

Sorkar laipuiin GST rate thara mi harsa zawk ten an lei theih tur chhiah a ti hniam a, mihring hriselna atana tha lo, vaihhlo leh zu kaihhnawih atanga chhiah lak zat a ti pung chu tha an tih thu mithiamten an sawi.

Akashvani Aizawl zawhna chhangin Pu Hrangtawna IRTS (Rtd) chuan sorkar laipuiin GST a ennawn chu tha a tih thu sawiin, tunhmaa GST rate a san avangin mipuite chhiah an chawi tam thin lutuk a ti a, nitina mipui mamawh bakah damlo harsa zawk te tana damdawi pawimawh, life-saving drugs ah te chhiah lak a ni tawh lo chu tha a ti hle tih sawiin, vaihhlo leh a kaihhnawih bakah zu atanga chhiah lak zat chu zaa 40-ah tihpun a ni a, mi rethei leh mi harsa zawkin an lei ve theih car tenau leh two-wheeler atanga chhiah lak zat tihniam a, car manto leh changkang zawkahte chhiah a tisang chu tha a ti hle a, ram tan pawh tha hlea a hriat thu a sawi a ni.

Byte: Pu Hrangtawna IRTS (Rtd)

Pu Hrangtawna chuan tunhnaia sorkar laipuiin GST a ennawn thut chu US-in chhiah chungchanga India a nawr nasat lutuk vang nia a hriat thu a sawi a, India chuan kum 2047-ah chuan khawvela economy chak ber nih tuma a beihna kalzelah Prime Minister Narendra Modi pawhin chhiah lak dan chu One Nation, One Tax tih sawiin, state tinah ang khat veka chhiah la turin a ti a, hei hi Mizorama sumdawngte leh thil leitu mipuite pawh tha taka kalpui turin a chah a ni.

<><><>

MNYF PRESS CONFERENCE

MNF Thalai Pawl chuan ZPM sawrkar in sum puk tam nan SNA SPARSH MODEL-ah zirlaite a dahkham an ti.

Vawiina Aizawl Press Club-a thuthar thehdarhtute an kawmnaah, MNYF Vice President Lalnunmawia Pautu chuan he thu hi sawiin, July Ni 7-a Ministry of Tribal Affairs-in Mizoram sawrkar hnena tribal scholarship cheng vbch 50 chuang a pek tawh laiin vawiin thlengin zirlaite hnen a la thleng lo an ti a, hemi chungchangah ZPM kaihhruai Sorkar chu mawhphurhna la turin an phut tih an sawi.

Kum 2023 atanga kum 2024 inkarah zirlai 3981-in Scholarship an la dawng kim lo a ti a, sawrkar kum kalta 2024 atanga 2025 session post matric zirlai 28459 leh pre-matric 8788-te'n scholarship an la dawn bawk tih sawiin hei hi a chhan chu Mizoram Sorkarin Scholarship Scheme chu a Department changtute rawn lovin SNA SPARSH MODEL ah a lo ziahluh vang a ni a ti.

Hetianga ZPM sorkarin hma an lakna chhan hi SASCI loan a puk tam duh vang nia sawiin, ZPM sawrkarin sum puk tam na atana SNA SPARSH MODEL-ah zirlaite a dahkham chu zirlaite a ngaihsak tawk loh vang leh sorkar sum enkawl dan an thiam tawk loh vang niin a sawi a. Kumin July Ni 7 khan Ministry of Tribal Affairs chuan Mizoram sawrkar hnenah cheng vbc 50, nuai 42, sing 8, sang 1 a rawn pe a, Zirlaite Scholarship pek vat a nih theih nan tihfel ngai te tifel zung zung turin sorkar an phut tih an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MNF

Manipur a Mizo National Front - Integration Movement(MNF-IM) inti ten tun thla ni 15 a an pawl din chu Mizo National Front, General Headquarters, Aizawl, Mizoram nen inzawmna a nei lo tih vawiin khan an sawi.

MNF Party thuchhuah tarlan danin, MNF-IM inti ten Mizoram nena inzawm emaw, Union Territory a awm emaw beiseia an hmalakna thu hi tun thla ni 16 khan an puangzar a, he thil hi MNF General Headquarters chuan a hriatpui lova, MNF hming an lo inphuah ve chungchangah pawh inzawmna pakhat mah an neilo an ti a ni.

<><><>

UNION CABINET

Union Cabinet chuan ramchhunga lawng siamna hmunpui leh a kaihnawih eizawmna ti nung thar turin package cheng vaibelchhe sing 6 sang 9 leh 725 a pawm. New Delhi-a chanchinbumite kawmin Union Information and Broadcasting Minister Ashwini Vaishnaw chuan he package hi lungphum pali ah a innghat a ti a. Ramchhunga lawng siamna hmun tih changtlunte, hun rei zawk daih tur sum ruahmante, grenfield leh brownfield shipward tih hmasawnte a nih thu a sawi. Pu Vaishnaw chuan ramchhunga lawng siamna hmunpuite tanpui a, National Shipbuilding Mission hmanga an hmasawmna vil an tum thu a sawi bawk a ni. Union Cabinet chuan railway hnuaia thawk mi nuai 10 sing 9 leh sang 1 chuangte tan Productivity Linked Bonus PLB ni 78 avaiin cheng vaibelchhe 1865 pek a remti bawk a ni.

<><><>

SEVA PARV

Mipui rawngbawl leh sawrkar inrelbawl na tha thupaia neiin Prime Minister Narendra Modia hnuaiah ramchhungah hmasawmna tam tak thlen mek a ni. Tun tum Seva Parv hunah chuan PM Modia sarwkarin

India hmalam hun atana IndiaAI Mission hmalakna lo tarlang ila. Artificial Intelligence AI hian mihringte nundan hnathawh dan leh ngaihtuahna a rawn thlak mek a. Hemi atana inbuatsaih nan PM Modia sawrkar chuan India AI Mission chu nikum March thla khan a lo pawm tawh a. He mission atan hian cheng vaibelchhe sing 1 leh sang 3 chuang ruahman a ni a. Tunah hian AI tihhmasawn kawngah India chu a hmahruaitu a ni mek a ni.

<><><>

PMAY-G

Sawrkar laipui chuan Pradhan Mantri Awaas Yojana-Gramin (PMAY-G) hnuaiah chenna in vaibelchhe hni leh nuai 82 chuang sak zawh tawh a ni a ti. Kumin August thla thleng khan chenna in vaibelchhe 4.12 sak turin Union Rural Development Ministry chuan state leh UT te bituk a siamsak a. Heng zingah hian chenna in vaibelchhe 3.85 chu sak tura phalna pek tawh niin chenna in vaibelchhe 2.82 chu zawh fel tawh a ni.

<><><>